

四庫全書

史部

欽定四庫全書

史部

皇朝文獻通考卷二百七十九

府丞臣龔駿文覆勘

總校官檢討臣何思鈞

欽定四庫全書

皇朝文獻通考卷一百七十九

兵考一

臣等謹案周官大司馬統六軍之衆掌九灋之職
詳哉其言之當是時永清大定之後載戢干戈載
橐弓矢越裳底貢肅慎來朝可云無事矣而講明
武備若是其委曲繁重何哉誠以兵者誅暴禁邪
威不軌而昭文德不可一日而不備也班固作漢

書十志而兵制僅附見於刑法中雖曰刑有三等
甲兵為大理本相通然使一代政令闕而未全論
者惜之自茲以還兵事日繁史各有志如馬氏通
考及五朝續通考所載得失燦然著矣我

朝龍興東土以武功開國自

太祖高皇帝始以戎甲十三聲基王迹創立八旗實為萬
世兵制所由昉

太宗文皇帝兼弱攻昧取亂侮亡一時大畏小懷所向無

敵

世祖章皇帝一著戎衣混一區夏增定中外營制益復精

詳

聖祖仁皇帝翦削逆藩戡定荒服功烈懋昭彪炳史冊

世宗憲皇帝宵旰勤勞繼志述事西北兩路用師申嚴戎

律更為明備我

皇上天錫勇智觀

光揚

烈比年以來

命將出師

親授方畧蕩平準噶爾回部大小兩金川豐功偉烈亘古罕聞而持盈保泰猶無時不警戒恬嬉蒐討軍實兵制之善洵足垂諸億載竊惟

列聖相承決策於廟堂之上而制勝於萬里之外

神機睿略運用無方固有非臣下所能揣測者然即其外見之迹窺之內外相維遠近相錯當其無事之

時養兵不試屹然有金湯之固及其不得已而用之

天戈所指電舉霆發無不立就削平蓋簡練精純規制嚴密自然之明效也臣等敬稽

列聖實錄

五朝國史兵志

皇上起居注冊

欽定大清會典及兵科錄書諸籍凡有關兵制者參酌

排纂具載於篇至於馬氏所列尚有車戰舟師之
目今水師營制已詳載直省兵內毋庸另編車戰
雖古法而不行於今茲編並削其目從其實也

兵制

臣等謹案設兵之制歷代因革損益雖互有不同
而其實不甚相遠其出於特創而無所因襲者則
我

朝八旗之制是也敬溯

國初先編立四旗以統人衆尋以歸服益廣乃增建
為八旗然猶統滿洲蒙古漢軍之衆而合於一也
迨其後戶口日繁又編蒙古八旗設官與滿洲等
繼編漢軍八旗設官與滿洲蒙古等合為二十四
旗其制以旗統人即以旗統兵蓋凡隸乎旗者皆
可以為兵非如前代有僉派召募充補之煩而後
收兵之用也洎乎

寶錄攸歸中外一統復設綠旗營以統漢兵蓋

本朝建旗辨色以相勝為用於是五德兼全五行悉備
內而京營則有親軍前鋒護軍驍騎步軍之分或
用上三旗或兼用八旗外而直隸各省凡駐防兵
用八旗各標及營汛兵用綠旗百餘年來增損隨
時悉臻盡善至於外藩諸部奔走偕來分職編旗
與內八旗相等有大征伐並帥師以從斯尤柔遠
之鴻圖迄於無外者也邇者西陲底定式廓版圖
列戍開屯規模益遠謹先叙各兵制建置之大綱

而以軍令附焉

太祖高皇帝辛丑年初設四旗先是癸未年

太祖以遺甲十三副起事征尼堪外蘭敗之益厲兵力以
次削平諸部歸附日衆初定出兵校獵不論人之
多寡各隨族黨屯寨而行每人各取一矢十人設
一長領之其長稱為牛录額真至是始分為四旗
曰黃旗曰白旗曰紅旗曰藍旗以純色為辨每旗
下以三百人為一牛录轄以牛录額真一人

臣等謹案是年為編牛录之始嗣後續設固山額
真梅勒章京甲喇章京等官至順治十七年始定
漢字稱都統副都統叅領佐領等名茲謹仍舊稱
以昭初制

甲寅年定八旗之制以初設四旗為正黃正白正
紅正藍增設四旗為鑲黃鑲白鑲紅鑲藍黃白藍
均鑲以紅紅鑲以白合為八旗統率滿洲蒙古漢
軍之衆每三百人設牛录額真一人五牛录設甲

喇額真一人五甲喇設固山額真一人每固山設
左右梅勒額真二人時滿洲牛录三百有八蒙古
牛录七十六漢軍牛录十六行軍時地廣則八旗
並列分八路地狹則八旗合一路而行

臣等謹案自後生齒日繁及中外臣民歸服者益
衆隨時增編滿洲蒙古漢軍佐領無定額

天命五年改設八旗官設總兵官分為三等其副
將叅將遊擊亦如之各牛录額真俱為備禦官每

牛录下設千總四人

天聰八年改定八旗官奉

諭凡我國官名皆當易以滿語勿仍襲漢語舊名今悉為釐定五備禦之總兵為一等公一等總兵官為一等昂邦章京二等總兵官為二等昂邦章京三等總兵官為三等昂邦章京一等副將為一等梅勒章京二等副將為二等梅勒章京三等副將為三等梅勒章京一等叅將為一等甲喇章京二等叅將為二等甲喇章京遊擊

為三等甲喇章京備禦為牛录章京旗長為壯達凡管
理不論官職管固山者即為固山額真管梅勒者即為
梅勒章京管甲喇者即為甲喇章京管牛录者即為牛
录章京管巴牙喇額真即為纛章京管巴牙喇甲喇
額真即為巴牙喇甲喇章京嗣後皆照我國新定者稱
之

又定八旗兵名奉

諭滿洲蒙古漢人前此騎步守哨等兵雖各有營伍未分

名色故止以該管將領姓名稱為某將領之兵今宜分辨名色永為定制隨固山額真行營馬兵為阿禮哈超哈巴牙喇營前哨兵為噶布什賢超哈駐防盛京兵為守兵預備兵為援兵各城寨兵為守邊兵舊蒙古左營為左翼兵右營為右翼兵舊漢兵為烏真超哈元帥孔有德兵為天祐兵總兵官尚可喜兵為天助兵

後天祐
天助兵

俱歸入
漢軍

臣等謹案阿禮哈超哈為驍騎營之始巴牙喇為

護軍營之始噶布什賢超哈為前鋒營之始烏真超哈為漢軍之始

九年設蒙古八旗先是八年以所獲察哈爾部千餘戶分給八旗是年正月復以察哈爾來歸各官並壯丁三千二百餘名均隸各旗至是始編審人丁及舊喀喇沁壯丁分為蒙古八旗其旗色與滿洲八旗同每旗設固山額真一人梅勒章京甲喇章京各二人分轄所編牛錄

崇德二年分漢軍為二旗先是天聰七年令滿洲各戶有漢人十丁者授縣甲一副共一千五百八十戶令舊漢兵之將領官統之以補各旗之缺額者至是始分為左右翼二旗其旗皆用皂色每旗設固山額真一人轄所編牛录

四年分漢軍為四旗時定旗色一以皂鑲黃一以皂鑲白一以皂鑲紅一純用皂色每旗設固山額真一人梅勒章京二人甲喇章京四人牛录章京

十八人

七年設漢軍八旗定旗色與滿洲八旗同每旗設
固山額真一人梅勒章京二人甲喇章京五人
順治元年

世祖章皇帝定鼎燕京分置滿洲蒙古漢軍八旗於京城
內鑲黃正黃旗居北方正白鑲白旗居東方正紅
鑲紅旗居西方正藍鑲藍旗居南方左翼自北而
東自東而南鑲黃旗在安定門內正白旗在東直

門內鑲白旗在朝陽門內正藍旗在崇文門內右翼自北而西自西而南正黃旗在德勝門內正紅旗在西直門內鑲紅旗在阜成門內鑲藍旗在宣武門內

又定八旗驍騎營制滿洲蒙古漢軍各八旗每旗各設都統一人副都統二人所屬叅領滿洲漢軍每旗各五人蒙古每旗各二人

康熙三十四年增設委署叅領雍正

元年改為副叅領

佐領約以三百人為率隨時編設無定

額驍騎校每佐領下一人稽所編人戶田宅兵籍

詳見後
禁衛兵

又定八旗都統所轄甲兵

本朝兵制各旗之官員兵丁其戶口屬籍無

不隸于都統至於簡用充補自驍
騎營而外則各該管大臣分領焉滿洲蒙古旗每

佐領下設親軍上三旗者隸領侍衛內大臣下五

旗者隸宗室王公設前鋒隸前鋒統領設護軍隸

護軍統領

康熙三十年於滿洲蒙古旗增設烏槍
護軍烏槍驍騎駝驍騎隸火器營總統

雍正二年設
乾隆十四年設圓明園設軍隸設軍營總統
雲梯前鋒兵隸健銳營總統
設步

軍領催及步軍隸步軍統領其本營領催與驍騎

及弓匠或鐵匠鞍匠等各隸本旗都統漢軍旗每

佐領下設步軍領催及步軍隸步軍統領其本營

領催與驍騎

雍正二年于漢軍每佐領下驍騎內設藤牌兵四名乾隆元年定漢軍每

旗設藤牌兵一百名於驍騎內選充各隸本旗都統

又定八旗前鋒營制滿洲蒙古八旗分左右兩翼

每翼各設前鋒統領一人率前鋒參領前鋒侍衛

前鋒校等其所轄為前鋒營兵備警蹕宿衛

詳見後禁

衛兵

又定八旗護軍營制滿洲蒙古八旗各設護軍統

領一人率護軍叅領

雍正元年增設副護軍叅領

護軍校等其

所轄為護軍營兵備警蹕宿衛及門禁傳籌

詳見後禁

衛兵

設領侍衛府滿洲蒙古鑲黃正黃正白上三旗設

領侍衛內大臣六人內大臣六人散秩大臣無定

員率一二三等侍衛及藍翎侍衛親軍校親軍等

康熙三十七年增設宗室侍衛及漢侍衛雍正
正三年增設四等侍衛於藍翎侍衛內選充備宿

衛扈從

詳見後
禁衛兵

設提督九門步軍營步軍統領一人率左右翼步

軍總尉

順治五年增設八旗副尉雍正四年增設
八旗叅尉乾隆十九年改總尉名翼尉副

尉名協尉叅
尉名副尉

八旗步軍尉等統轄滿洲蒙古漢軍

八旗步軍掌守衛巡警其城門尉城門校

乾隆十
九年改

城門尉名城門領
城門校名城門吏

門千總等掌城門啟閉設巡捕

營叅將遊擊等官統轄馬步兵分汛巡緝別領於

兵部職方司

初設南北二營十四年增設中營康熙三十年始令步軍統領兼管乾隆

四十六年增設左右二營為
巡捕五營詳見後禁衛兵

設內府三旗初定三旗設滿洲佐領旗鼓佐領正

黃旗朝鮮佐領內管領等統各護軍驍騎隸領侍

衛內大臣管轄

後改隸內
務府總管

嗣後以次增設叅領副

叅領及護軍統領復添設前鋒分為護軍前鋒驍

騎三營備宿衛扈從

盛京內府三旗官員兵丁
屬盛京內務府總管仍由

在京內務府掌其升
選俱詳見後禁衛兵

設

盛京八旗駐防兵時以遷都燕京

命內大臣何洛會為

盛京總管設左右翼梅勒章京各一人統領滿洲蒙古漢軍八旗兵駐防

盛京並設各城城守官至三年改總管為昂邦章京十年增設寧古塔昂邦章京康熙元年改

盛京寧古塔昂邦章京並稱將軍十五年移寧古塔

將軍駐吉林船廠城二十三年增設黑龍江將軍
三十八年移黑龍江將軍駐齊齊哈爾城與副都
統統轄城守尉防守尉防禦各員

詳見後
直省兵

設直省八旗駐防兵時初設獨石口張家口防禦
分遣甲兵駐防至二年復遣八旗兵駐防直隸之
順德府山東之濟南府德州臨清州江南之徐州
府山西之平陽府潞安府蒲州府凡八城每城設
協領一人滿洲章京四人蒙古漢軍章京各二人

尋復增定江南江寧府浙江杭州府等處駐防兵
制嗣後隨各省形勢設將軍都統副都統或但設
城守尉防守尉駐防

詳見後
直省兵

設直省綠旗營凡直省漢兵俱以綠旗為辨總督
所屬為督標巡撫所屬為撫標提督所屬為提標
總兵所屬為鎮標自總兵而下則為副將叅將遊
擊都司守備千總把總各員而總督則節制巡撫
標及提督總兵標提督又節制各鎮總兵標各鎮

標統轄各協及各營其屬於河道總督者為河標
所轄各營專司防河護運屬於漕運總督者為漕
標所管各衛所專司分幫領運

詳見後
直省兵

設外藩扎薩克各旗先是天命天聰年間科爾沁
等各蒙古相繼款附予以封爵定鼎之後以次編
旗凡內扎薩克二十五部為五十一旗每旗扎薩
克一人協理旗務者無定員以王貝勒貝子公台
吉等為之設都統副都統

以本旗台吉內
以原爵兼任

叅領佐

領驍騎校驍騎如內八旗之制至康熙三十年設
喀爾喀各旗三十六年設賀蘭山厄魯特旗及哈
密旗四十三年設額濟內土爾扈特旗雍正三年
設青海各旗十年設土魯番旗乾隆十九年設都
爾伯特各旗各隨人衆編佐領有差

詳見後

設守衛

陵寢官員兵丁先是天聰八年

永陵設散秩官至順治初

福陵

昭陵各設雲騎尉五年增設散秩官八年

永陵增設騎都尉雲騎尉嗣後

盛京

三陵各增設總管副總管防禦驍騎校等員嗣又于

京師

東陵

西陵各設總管副總管防禦驍騎校等員

園寢各設防禦驍騎校等員所屬八旗驍騎各有差

詳見後

八年定王公府屬武職官員兵丁分別親王郡王貝

勒貝子鎮國公輔國公等以次設長史散騎郎護

衛等職並府屬佐領下各設驍騎校驍騎有差

詳見後

十七年定八旗漢字官名奉

諭嗣後固山額真清字仍稱固山額真漢字稱為都統梅

勒章京清字仍稱梅勒章京漢字稱為副都統甲喇章
京清字仍稱甲喇章京漢字稱為叅領牛录章京清字
仍稱牛录章京漢字稱為佐領昂邦章京清字仍稱昂
邦章京漢字稱為總管烏真超哈清字仍稱烏真超哈
漢字稱為漢軍尋又經大臣議定噶布什賢噶喇昂邦
漢字稱為前鋒統領巴牙喇蘇章京漢字稱為護
軍統領噶布什賢章京漢字稱為前鋒叅領巴牙
喇章京漢字稱為護軍叅領噶布什賢壯達漢字

稱為前鋒校巴牙喇壯達漢字稱為護軍校分得撥什庫漢字稱為驍騎校

臣等謹案雍正元年以八旗都統印信所有滿文固山額真字樣額真二字非臣下印信所得濫用改為固山昂邦

康熙十四年設游牧察哈爾八旗時以遷察哈爾部衆於宣化大同府邊外編為八旗設叅領佐領護軍校驍騎校護軍驍騎等

康熙三十八年增設總管如內八

旗之制隸八旗蒙古都統

後設都統駐張家口
管轄詳見後直省兵

二十三年設三旗虎槍營總統一人以公侯大臣

兼任總領六人率三旗虎槍兵專備蒐狩行田

詳見

後禁
衛兵

三十年設火器營總統無定員

雍正年間
定為六人

以王公

大臣兼任

乾隆二十九年增設
掌關防營總八人

率八旗鳥槍護軍

叅領護軍校驍騎校等統轄鳥槍護軍鳥槍驍騎

校驍騎掌演習火器

詳見後
禁衛兵

雍正二年設

圓明園八旗護軍營總統無定員以王公大臣兼任

率營總

十年增設
護軍叅領

副護軍叅領護軍校等統轄護

軍於

圓明園分地駐劄以備翊衛

詳見後
禁衛兵

設

圓明園內府三旗每旗設護軍叅領副叅領護軍校

等

十年增
設營總

統轄護軍屬

圓明園總統王公大臣仍隸於內務府

詳見後
禁衛兵

設八旗養育兵奉

諭八旗滿洲蒙古漢軍均係累世効力舊人承平既久滿洲戶口滋盛餘丁繁多或有丁多之佐領因護軍驍騎皆有定額其不得充伍之間散滿洲至有窘迫不能養其妻子者每思及此惻然動念將如何施恩俾得生計之處再四籌畫並無長策欲增編佐領恐正餉不敷若不給以錢糧俾為養贍何以聊生既不能養其家口何

由造就以成其材今將旗下滿洲蒙古漢軍共選四千
八百人為教養兵訓練藝業每人各給三兩錢糧每年
共需錢糧十七萬二千八百兩每旗滿洲蒙古漢軍共
六百名內滿洲每旗四百六十名蒙古六十名漢軍八
十名其漢軍之八十名令為步兵食二兩錢糧就此錢
糧數內通融料理可多得四十名漢軍每旗著選百二
十名此所設教養兵若計佐領選取恐多寡不同應於
叅領下計數選取至乾隆三年復定滿洲蒙古各旗原

設養育兵每二名出缺作為三名照漢軍例各給銀二兩滿洲蒙古旗每佐領下增足養育兵十名漢軍旗每佐領下增足六名十八年復定養育兵每三名出缺作為四名再

恩賞一名各改給銀一兩五錢時於原養育兵一萬五千一百二十四名外勻出缺五千四十四再

恩賞缺五千四十四共二萬五千二百十二名食銀四十五萬三千八百十六兩二十九年復定滿洲蒙

古之養育兵二萬三百十五名每年增食米一萬六千一百石有奇

乾隆十四年設健銳營總統無定員以王公大臣兼任率兩翼翼長八旗前鋒叅領副叅領前鋒校等統轄前鋒兵演習雲梯諸技是即為雲梯兵

詳見

後禁衛兵

二十六年設西域新疆駐防兵時以平定準噶爾回部分派滿洲兵索倫兵察哈爾兵及綠旗兵視

各處情形酌量分駐卡倫兵領以侍衛屯田兵領
以督屯武職駐防馬兵隸于佐領綠旗兵隸于營
員其回兵則令各城伯克經理而以駐劄之將軍
大臣總轄之各兵丁或攜眷永駐或三年更代以

次增設無定額

詳見後
直省兵

四十六年奉

諭向來各省提鎮以下至將弁等俱有分扣兵丁名糧
作為得項者此例定自何年其每員應得若干係何

名目各省是否一例按照地方情形品級大小酌定
數目多寡又或各省參差不同著交各該部將定例
年月及現在款項數目分晰查明分單具奏至此事
因循已久恐又於定數之外私自剋扣增添者若每
員任內私扣一名後任積漸加增侵扣無所底止督
撫姑息不加查察久之即為虛額空糧之弊尤不可
不徹底清查著傳諭各督撫將各省提鎮以下武職
現在分扣名糧實數及有無私添之處查明據實具

奏

又

諭國家設兵衛民簡核軍實期于營伍整齊兵額充足如兵丁等紅白事件從前設有生息惠濟銀兩以資賞卹後因生息名色有關國體特敕停止昨陝甘添兵案內籌及賞卹聲請酌復惠濟銀兩朕以國家賞兵之費藉商生息支給究屬非宜已傳諭令其動用正項開銷各省兵丁紅白銀兩原係加惠行伍格外

施恩若因此裁扣名糧致額不足殊非核實行伍之道所有各省營伍賞卹兵丁紅白銀兩自乾隆四十七年為始俱著於正項支給造冊報部核銷至各省提標以下武職員弁俱有應得坐糧馬乾等項令軍機大臣會同該部核辦照文員之例議給養廉其所扣兵餉即可挑補實額核計添給養廉歲支不及二百萬兩官員既無拮据而各省又增添兵力於行伍大有裨益所有辦理添補兵額紅白賞卹銀兩及名

糧裁添養廉緣由明晰曉諭中外知之尋議定直隸
省裁養廉名糧三千八百七十名賞卹名糧九百
名增實兵四千七百七十名山東省裁養廉名糧
一千五百九十三名增實兵一千五百八十一名
山西省裁養廉名糧二千一百六十名賞卹名糧
四百三十五名增實兵二千五百九十五名河南
省裁養廉公費名糧一千一百八十三名增實兵
九百七十九名江南省裁養廉名糧四千四百十

一名賞卹名糧六百名增實兵五千十一名江西
省裁養廉名糧一千三百三十七名賞卹名糧二
百五十名增實兵一千五百八十七名福建省裁
養廉名糧四千七百五十六名公費名糧一千四
百八十名增實兵四千七百五十六名浙江省裁
養廉名糧三千七百七名公費名糧一千一百四
十名增實兵三千三十九名湖北省裁養廉公費
名糧二千九百三十三名增實兵二千三百八十

名湖南省裁養廉公費名糧三千三百八十六名
增實兵二千五百八十八名四川省裁養廉公費
名糧四千二百七十四名增實兵四千二百七十
四名陝西甘肅二省裁養廉公費名糧七千九百
三十名已增兵一萬二千七百三十名無庸改募
廣東省裁養廉名糧五千七百七十四名增實兵
五千七百七十四名廣西省裁養廉名糧三千三
百三十四名增實兵二千三百三十四名雲南省

裁養廉賞卹公費名糧五千七百八名增實兵五千四百六十名貴州省裁養廉賞卹公費名糧五千二百八十二名增實兵五千二百八十四名
兵額

八旗滿洲兵五萬九千五百三十名

八旗蒙古兵一萬六千八百四十三名

八旗漢軍兵二萬四千五十二名

京城巡捕營兵一萬名

直隸省兵三萬九千四百二名

山東省兵一萬七千五百四名

山西省兵二萬五千七百五十二名

河南省兵一萬一千八百七十四名

江南省兵四萬八千七百四十七名

江西省兵一萬三千九百二十九名

福建省兵六萬三千一百十九名

浙江省兵四萬三十七名

湖北省兵一萬七千七百九十四名

湖南省兵二萬三千六百四名

四川省兵三萬二千一百十二名

陝甘省兵八萬四千四百九十六名

廣東省兵六萬八千九十四名

廣西省兵二萬三千五百八十八名

雲南省兵四萬一千三百五十三名

貴州省兵三萬七千七百六十九名

軍令

國初定凡親王郡王貝勒貝子公等遇敵交鋒若七旗敗遁一旗攻戰有裨于七旗者將七旗佐領下人丁給與一旗若一旗敗遁七旗攻戰將敗遁人丁分與七旗若一旗內一半攻戰一半敗遁將敗遁人丁撥與本旗攻戰之人若一旗內一半有事他處未與攻戰半旗雖敗人丁留給本旗未戰之王貝勒貝子公等其攻戰之各旗酌量給賞若遇

敵猝乘七旗未及準備而一旗獨能攻戰亦止照功給賞其七旗免革人丁

凡曠野遇敵時如不按隊伍輕入敵陣或見敵兵單少擅自奔馳者將所乘之馬並本處所獲人口入官

凡列陣攻戰時須從容縱馬各照對敵前進如遷延趨避尾附他隊或他隊已進立視不前者各按所犯治罪

凡進兵時或有稍先稍後者克敵後不許彼此爭競至敵人敗北宜追者須選精騎當先其都統護軍統領等各領本營分隊隨後以防追兵陷入埋伏倘追趕時或被伏兵攔截都統護軍統領等即行迎敵

凡出兵時各認本佐領旗號依隊而行都統副都統護軍統領叅領佐領各以次管轄嚴行約束不許離伍亂行爭取遺物不許喧嘩酗酒如亂行者

罰銀三兩給拏獲之人喧嘩酗酒者責治至失火者論死夜間行營勿得無故吹哨違者治罪

凡軍士盔甲及軍器馬絆等俱釘字號馬尾後拴牌烙印馬無印者罰銀二兩箭無字者罰銀十兩給拿獲之人無銀者鞭三十如偷盜鞍轡籠頭等物者照偷盜例鞭責

凡有一二人妄行搶掠被人傷害者即將妻子入官該管官仍治罪

凡搶奪民人柴草者鞭八十賠還柴草該管官罰俸一年

凡官兵出征不許拆毀神廟妄殺平人已經俘獲者勿得剥取衣服拆散夫婦至不堪俘獲者亦不得傷害其俘獲之人勿令看守馬匹

凡發兵之時兵丁或在家或在外如有違約者該管叅領佐領等官每兵一名罰銀五兩若至草職等罪奏聞定奪兵丁不遵約束者酌量所犯責治

該管官仍議處至康熙十一年復定官員出征在家規避不起身者革職在外違約者革職提問護軍及領催兵丁等在家規避不起身者鞭一百仍發往軍前在外違約者鞭一百所獲人口入官若係差遣之處不遵號令違誤者鞭一百出兵之處不遵號令妄行者為首正法餘枷號三月鞭一百該管官罰俸一年

凡出征大臣嚴禁兵丁不許搶掠如縱兵搶掠并

指良為賊妄行殺戮者從重治罪至康熙十八年復定領兵諸王將軍等有借通賊為名燒民房舍擄掠子女財物或分兵所往之處私自擄掠者令該督撫題參治罪如有隱匿事發之日督撫草職凡臨陣多寡不敵在危急時有人救出者照被救人陣亡卹賞減去其半其一半官出一分被救出一分給能救之人如兩軍相戰時有能將落馬之人救出與馬騎者係公以下副都統以上給銀

一百兩叅領輕車都尉以下給銀六十兩平人給銀二十兩俱於落馬人名下追給如將屍骸救出者賞給官馬一匹其樵牧軍士亂行陷敵有人救者亦照卹賞減半於帶領官名下追銀給能救之人若不係亂行帶領官無罪令被救人給銀救出至親者不在此例如攻城不克將城下受傷之人救回者亦照卹賞減半官出一分被救人出一分給能救之人如將屍骸救出者令同領戰官給銀

三十兩至康熙十九年復定或野戰或攻城如有陣亡屍骸不能救出者同戰之叅領散秩官護軍校驍騎校降二級調用領戰之該管官降一級調用領戰之大臣罰俸一年

凡攻戰失利官兵有受傷者免其議處至康熙二十三年復定官員兵丁受傷退回者若係頭等二等傷痕免議三等以下傷痕仍與失利者同罪如未經受傷冒作傷痕退回者照規避例治罪若係

官員重傷止許親隨人等送出無親隨人令甲兵
一二名護送兵丁重傷亦止令甲兵一二名護送
多差者差撥各官治罪多送之甲兵亦同議處

康熙三十四年議定軍令條約凡遇出征各該都
統護軍統領副都統叅領等查明官兵盔甲弓箭
應需一切軍器務令精銳堅固兵丁盔尾及甲背
令其拴姓名甲牌馬駝繫尾令其拴寫旗分佐領
姓名並用印烙凡起行及途次官兵各帶輜重按

本旗纛行走毋得前後攙越如有亂行酩酒者即
拿懲責自出城以至回兵不得喧嘩喊叫違者懲
責結營之時各按本隊駐劄如有攙越旗分前後
亂營者並將該管大臣官員議處其馬無印者罰
銀二兩箭無字者罰銀十兩俱給與拿獲之人偷
盜籠頭馬絆馬韉者鞭責偷盜鞍轡等物及馬匹
者按贓之多寡治罪失火者從重究治官兵及跟
役人等所過地方不得擾累百姓搶奪馬匹踐踏

田苗妄離本營潛入村莊山谷強取物件違令者
嚴加懲治該管官及本主一併議處如兵丁及跟
役逃走在卡倫以內者即行查拿照例治罪已逃
出卡倫者即派官兵務窮追獲無論兵丁及跟役
即按軍法追拿不獲者將追趕之官兵治罪逃人
之主並該管官一併嚴加治罪凱旋之日如有私
賣盔甲軍器者從重治罪該管官議處再馬駝係
大兵緊要之項添撥官兵加意揀擇水草牧放進

兵之時派留官兵在後查收遺失疲乏馬駝其遺失者按照印烙並所拴名姓交還原主疲乏者開明馬駝毛皮數目交與就近地方官或村莊百姓等收養將數目報明兵部如敢隱匿乘騎及宰殺者嚴加治罪其遺失馬駝之主令將馬駝毛皮開明報兵部註冊坐卡人等不許攜燧前往各按旗分將小旗帶往離大營稍遠放卡加謹瞭望晚間撤回就近住宿放卡地方不許攜帶帳房不得舉

火止許乘一馬前往馬不離鞍勿寫遠散放如有敵至審實即刻報明領軍將軍大臣如並非敵寇誤報及賊人將近漫無知覺怠忽報遲者將放卡官兵即在軍前按法從重治罪示衆其坐堆官兵夜間弓必上絃毋得脫衣加謹防守如駐劄地方兵丁每日射箭修理軍器務令精銳仍不時將所傳軍令曉諭堆卡加意嚴肅晝夜不許閒人行走凡有行走之人詳悉詢問所穿衣帽所備器械可

異者即行拘拿如坐堆卡之人疎忽怠玩或偷眠
或空一二人者該管大臣官員查出將官兵嚴加
治罪至與敵相近領兵將軍大臣酌量添撥前鋒
章京兵丁前往務令探明敵人虛實踏看地方情
形遇敵對陣時領兵將軍大臣務必詳審地勢或
係曠野或係排駝營陣或係排列櫓木營陣並令
某隊伍某旗擊賊之處詳加指示鳴螺進兵于敗
賊後亦鳴螺收兵進攻之時如敵寇堅勁不動即

令預備兵丁前往應援如違者將領兵將軍大臣
治罪敵人在對面進攻之時如王貝勒貝子公大
臣等有越次前進者不准議功仍行治罪務須排
列整齊緩轡前進如不按本隊尾隨他隊及離棄
本隊由他隊前進並他人前進佇立觀望者應治
以斬絞籍沒懲責革職之處各按所犯擬罪進攻
之時或有稍先稍後者不得彼此爭競既能隨本
旗敗賊有將伊議論者即係心術不端置之勿論

如賊入不能抵敵敗走即選精壯兵馬追趕隨即
分隊接踵前進如追趕之人誤陷伏兵或突遇他
寇後隊即接刃攻擊嚴禁兵丁毋許擄掠牲畜財
物如正當對陣之際違令希圖搶奪財物者即將
官兵治罪其有責任之大臣官員既經給有親丁
軍前若再挑取護軍披甲漢仗好者則對敵之時
精銳兵丁必致缺少嗣後大臣官員除原有親丁
外軍前不許挑取其無親丁官員及委署之章京

等出征各准挑取一名再軍糧所關綦重凡出征之時官兵口糧務令按定日期裹帶如不按數以致缺少者將該管官並少帶之兵從重治罪其有跳越排駝營陣及排列櫓木營陣身故者准從優議恤領兵大臣有能嚴行約束官兵不致擄掠為非者陞賞如縱容官兵擾害良民者從重治罪凡與敵相近一切軍令既經傳諭仍敢故違者將違令之人即按軍法如有傳行不至者亦按軍法從

事

雍正九年申定軍律奉

諭自古用兵之道首以申明號令為務周易曰師出以律周書曰不愆於六步七步不愆於四伐五伐六伐七伐乃止齊焉可知進退步驟之間尺寸不可違越方為節制之師而平日必須申明號令使三軍之士無不熟知深曉倘其中或有不遵者則按軍律置之於法是其獲罪乃本人之自取無所歸咎雖領兵將帥不能以已意一

毫輕重於其間此大公之道也我國家武備精強超越
往古從來軍行之際紀律嚴明信賞必罰是以天戈所
指迅奏膚功此中外臣民所共知者今承平日久新進
少壯之人未曾親履戎行則於從前規制未必一一諳
練若不詳細申明宣諭以致官兵丁等或因陷於不
知而遽罹罪譴朕心實為不忍今特令大臣等酌議軍
令條約經朕親加鑒定凡大端細務莫不備載其中蓋
以軍機關係至重必使事事合於紀律人人祇奉章程

勿犯重罰而妄冀從輕勿因事小而不遵成法將來荷
天眷佑奏凱言旋凡我弁兵等數十萬人有大功而無小
過此則朕心所厚望者也著即刊刻交與兩路大將軍
通行頒布咸使凜遵

一戰陣之際聽掌號擊鼓鳴金為進止如有聞聲
不進聞聲不止者斬

一臨陣須奮勇前進如有回顧畏縮交頭接耳私
語者斬

一專司掌號擊鼓鳴金之人聞令即掌號擊鼓鳴金令止即止違者八旗兵鞭四十綠旗兵棍責三十如臨陣違令者斬

一將軍密傳軍令如轉傳之人將其中要言私自增減並將疑似之言添造者斬

一將軍授緊密軍令如敢私告他人以致宣揚誤事者斬

一將軍叅贊大臣領兵提督總兵等官密議軍情

時如敢私行竊聽即係洩漏軍機之人犯者斬

一差往探聽敵人形勢如有畏縮不往詭稱已到
彼處及以少報多以多報少探信不實貽誤軍機
者斬

一官兵沿途欺壓民番恃強買賣掠財物毀房屋
淫污婦女者俱斬

一官兵殺傷良人冒功者斬

一官兵將他人戰功冒為己功及詭稱有功以虛

作實以輕報重者斬

一指稱夢寐中見鬼神無故造言惑衆者斬

一兵丁竊馬潛逃者該管官即派頭目追拿如在
劉營地方犯者八旗兵鞭一百綠旗兵棍責八十
如係臨陣時梟首示衆

一遇有遺失馬匹其獲馬之人即稟明該管官查
問給還如有隱匿私乘者八旗兵鞭五十綠旗兵
棍責四十仍挿箭遊營如私行屠宰或偷賣與他

人者俱斬

一劄營地方兵丁輪班守卡務宜嚴肅訪察夜遇
警急即密稟申報備設以俟如有擾動散走驚怖
喧嘩以致亂營者斬

一夜傳軍令怠慢不遵以及巡查坐卡偷安眠睡
致悞更曠班者八旗兵鞭一百綠旗兵棍責八十
該管紅旗管隊不行查報者棍責四十如臨陣時
兵丁犯者斬

一兵丁面承該管官諭令其辭色之間顯形傲慢者八旗兵鞭五十綠旗兵棍責四十如有意抗違致悞軍機者斬

一兵丁故意私語嗟怨長吁短歎者八旗兵鞭七十綠旗兵棍責六十責後復犯並臨陣時故違者斬

一兵丁不守軍令無故聲喊並在營內混行走動高聲言語白晝犯者八旗兵鞭五十綠旗兵棍責

四十如起更後驚呼妄動以致亂營者斬

一兵丁有晝夜夢魘者其左右同帳房之人即行喚醒如有隨聲應和以致擾亂合營者八旗兵鞭七十綠旗兵棍責六十該管委署護軍校領催紅旗管隊揔箭遊營如臨敵營犯者斬

一疎防失火燒燬草廠者八旗兵鞭一百綠旗兵棍責八十如在對敵要地失火致燒草廠者斬

一兵丁失火燒燬衣服器械者八旗兵鞭五十綠

旗兵棍責四十如在存貯火藥地方失火者八旗
兵鞭一百綠旗兵棍責八十該管委署護軍校領
催紅旗管隊及護軍校驍騎校千總把總俱挿箭
遊營如臨陣時營內失火致悞大事者兵丁及該
管委署護軍校領催紅旗管隊俱斬

一管守營門無故私縱人擅入者八旗兵鞭七十
綠旗兵棍責六十如對敵時犯者斬

一差往探信之人如遇投誠敵人先稟明領兵官

有不行稟報者八旗兵鞭七十綠旗兵棍責六十
如將投誠之人不即解送致復行逃散者八旗兵
鞭一百綠旗兵棍責八十因而洩漏軍中虛實者
照洩漏軍機律斬

一大兵進勦敗敵後如有遺棄馬匹財物務須等
候軍令派撥官兵收取如私行奪取者挿箭遊營
因而擾亂隊伍者斬

一兵丁中途染病該管委署護軍校領催紅旗管

隊即與護軍校驍騎校千總把總一同驗確稟明
該管官令醫調治如不行驗看調治該管委署護
軍校領催鞭五十紅旗管隊棍責四十護軍校驍
騎校千總把總揷箭如兵丁詐病偷安者斬

一凡有倚強壓弱酗酒為非不遵該管官約束者
分別輕重鞭責揷箭

一兵丁各按隊伍依次而前無論道路坦平窄狹
後隊俱不得越過前隊違者八旗兵鞭五十綠旗

兵棍責四十仍揷箭遊營

一劄營之後各帳房內派出一人看藍旗出營則取柴看黑旗出營則取水有便溺者守營官兵驗明所帶照牌准其出入起更後非係奉差一槩不許出營違者八旗兵鞭四十綠旗兵棍責三十該管委署護軍校領催紅旗管隊不行約束者揷箭一兵丁在營敢在該管官面前妄行動作驕慢無禮者揷箭遊營

一並無緊急事私行跑馬者八旗兵鞭五十綠旗兵棍責四十仍將馬匹撤回令其步行

一兵丁支領口糧如有肆行拋棄狼籍者八旗兵鞭一百綠旗兵棍責八十該管委署護軍校領催紅旗管隊不即呈報者揷箭

一兵丁押運軍糧沿途如敢私盜升合或竊盜同行兵丁口糧及損傷盛米布袋致多虧折者八旗兵鞭一百綠旗兵棍責八十

一各營馬步兵所帶槍礮火藥不加謹收貯以致潮濕不能過火及攜帶行走時任意糜費者八旗兵鞭五十綠旗兵棍責四十該管紅旗管隊揷箭遊營如不加謹以致遺失者八旗兵鞭一百綠旗兵棍責八十該管委署護軍校領催紅旗管隊揷箭遊營

一兵丁所帶鉛彈務按槍口大小如式製造如鉛彈不合槍口係平日演放時查出八旗兵鞭五十

綠旗兵棍責四十仍挿箭遊營該管委署護軍校
領催紅旗管隊挿箭遊營護軍校驍騎校千總把
總挿箭如臨陣時將不合槍口鉛彈施放者斬該
管委署護軍校領催鞭一百紅旗管隊棍責八十
護軍校驍騎校千總把總挿箭遊營營總叅領叅
將守備記大過一次

一弓箭撒袋腰刀皮索一切軍器不行收管以致
遺失並應帶器械不隨身攜帶者八旗兵鞭一百

綠旗兵棍責八十該管委署護軍校領催鞭四十
紅旗管隊棍責三十護軍校驍騎校千總把總插
箭

一路見他人遺失腰刀弓箭等物即行拾取稟明
該管官查問給還如見物不拾並拾物不稟明者
八旗兵鞭四十綠旗兵棍責三十仍挿箭遊營

一兵行遇有草地方當陸續行走如有不顧隊伍
混行致踐踏好草者八旗兵鞭一百綠旗兵棍責

八十劄營之時牧放馬駝牛羊如敢離所指之地
任意到處蹂躪者八旗兵鞭一百綠旗兵棍責八
十仍揀箭遊營該管官揀箭

一兵行時馬駝弔臚及牧放各項牲畜之處俱有
傳檄官兵各宜遵照如不按法牧養者八旗兵鞭
一百綠旗兵棍責八十該管官揀箭

一營內所挖井泉不許污穢其飲馬泉水務須另
挖違者八旗兵鞭一百綠旗兵棍責八十

一劄營地方所有泉水飲馬時務須挨次往飲毋得爭先以致壅塞違者八旗兵鞭一百綠旗兵棍責八十

乾隆十三年增定軍律奉

諭軍旅乃國家第一要務軍法從事定例綦嚴今刑律內玩寇老師有心貽誤竟無正條非所以重軍務儆戒失律也夫科場作弊尚即正典刑若以行軍相較孰為輕重自應稽察舊案明著刑章俾衆知畏法方

能鼓勇用命此非朕欲用重典實以昭示武臣肅紀
律而勵勇敢辟以止辟之義也見在纂修會典著軍
機大臣會同該部詳酌定議具奏載入遵行

一統兵將帥苟圖安逸故意遷延不將實在情形
具奏貽誤軍機者擬斬立決

一將帥因私忿媚嫉推委牽制以致糜餉老師貽
誤軍機者擬斬立決

一身為主帥不能克敵轉布流言搖惑衆心藉以

傾陷他人貽誤軍機者擬斬立決

十四年

申諭內外武職衙門奉

諭國家設立營伍領以將弁所以禁暴止奸折衝禦侮
責綦重也兵法失律有誅書稱不用命戮于社立法
之嚴如此近來法司衙門於官犯相蒙多入緩決因
而武弁亦邀寬典大非立法之本意夫軍旅之事國
家不能保其百年不用必當申明紀律信賞必罰方

足以振憲綱而作士氣誠使為將弁者在平時則勤訓練嚴拔補謹巡防以固疆圉設有緩急統帥則詳審機宜熟籌勝算其偏裨士卒則奮勇爭先摧鋒陷陣不避矢石効指臂之使自能克敵制勝若平時不能拊循而流于廢弛或苛急而激為忿怨偶遇小醜竊發則號令不明指揮不定畏葸退縮縱寇老師或臨陣之時望風委靡甚至欺蔽容隱負恩債事國家所以為干城腹心者何在此而不誅何以示懲乃使

久繫圜圉累歲經年虛擬罪名獲全首領是散法也
後之任事者何由知戒朕以仁治天下慎重民命罔
敢弗欽而天討所在朕勿敢赦如訥親張廣泗之誤
國負恩屢頒諭旨已立正典刑慶復之欺蒙縱寇亦
已賜令自盡而詳開秋朝審冊內除李寶粹宋宗璋
尚須待質袁士弼情非退縮應該緩決此外如許應
虎之失誤軍機臨陣退縮沈瑞龍之私回任所託病
偷安胡璘劉鍾之懼怯退避離汛失守又如張通

楊文富之棄地不守阻回援師皆法之斷不容貸而情之毫無可原者即其中有先經緩決之犯皆令改擬予勾正法以為炯戒凡在披堅執銳之徒當思臨陣爭先赴蹈危險死于鋒鏑或所不免而國家加恩贈卹廕及子孫如有退縮偷安挫衄失事縱一時苟免終於身伏斧鑕等死耳死敵者榮死法者辱雖至愚亦當審擇而知所處矣若專事姑息積玩成疲於軍務大有關繫訥親張廣泗慶復之敢於貽誤未必非

向來失律倖免人心無所震悚有以啟之也今於勾
到後特頒此諭詳悉開導令武臣咸知債事者必無
軼罰罹罪者斷難倖生與其伏法於悞事之後不如
捐軀於臨事之時大義昭然將必致身効命以戰則
克以守則固不致苟且偷生蹈於顯戮正辟以止辟
之義也此諭著刊刻頒發令內外武職衙門入於交
鑒冊內永遠傳示各宜凜遵

四十九年

頒發行軍簡明紀律

諭前因甘省勦捕逆回時綠營官兵於馬家堡打仗因軍裝火器被雨潮濕俟烘烤完妥再為前進並有懦怯退縮者當經降旨通飭各督撫務宜隨時加意整頓今逆回之事雖完但思整肅營伍固在督撫提鎮之實心督飭而平時操演講習更在將弁之面為指導兵丁之明曉軍律國家累洽重熙承平無事兵可百年不用不可一日無備與其臨時告誡不若先事

講求著軍機大臣會同該部將行軍紀律擇其緊要
數條務須簡切明當使兵丁人人知曉盡成勁旅以
示朕整飭戎行之至意

一兵丁隨征勦賊俱應奮勇直前其見賊退走者
不過各惜身命心懷畏怯試思臨陣退走律應斬
首示衆若能殺賊立功必蒙陞賞即或陣亡

國家自有卹典子孫俱得邀恩兵丁等與其臨陣畏
蒺難逃

國法何如爭先殺賊奮不顧身況勇往直前未必即死一經退後斷不能生此理甚明該管將備等平時將此諄切告誡務令兵丁等咸知大義臨陣時自必勇氣百倍可期殺賊立功

一鳥槍弓箭最為行軍利器若兵丁等臨陣時尚未見賊遠將槍箭施放及至交戰火藥箭枝俱已用完無以禦敵即同束手待斃關係甚重凡領兵將備平時務須講習令兵丁於臨陣遇賊槍箭可及之

處不先不後一齊施放庶槍箭隨聲應手皆獲實用

一行軍攜帶軍裝火藥俱應在帳房收貯毋令潮濕即或途中遇雨亦須嚴密遮護庶遇賊緩急可用凡帶兵將備等須嚴加曉諭勿致潮濕或需烘烤以致臨時貽誤至弓箭槍刀等平時尤須修整堅利不得廢弛

一臨陣對敵倘遇將領受傷隨從兵丁更當奮勇

直前竭力救護若兵不顧將各惜身命觀望退阻
最為惡習亟應申明軍紀俾衆知悉凡遇將領受
傷兵丁不即時救護竟致潰散脫逃者查明按名
處斬其能奮勇保護者立即議功優賞以示鼓勵
該管將備等平日尤當愛惜士卒臨事賞罰公平
庶兵將同心合力所向無敵

一兵丁對敵乘勝追趕刻不容緩若兵丁等有貪
搶賊人遺棄財物以致賊衆逃遁貽誤不小該管

將備等於領兵臨陣時務須通行曉諭違者立即
依律治罪庶兵丁等各知儆畏

一營卡最關緊要凡領兵將備等務須嚴飭坐卡
兵丁輪班防守留心偵探毋得怠惰偷安即探察
有事只須選派明幹一二人密行飛稟餘仍嚴整坐
守毋許輕動無事時不許高聲喊叫致亂營規違
者俱照軍法嚴治

一兵丁遇有調撥自當恪守軍令即時遵行如敢

騷擾地方欺壓良民蹂躪田禾搶掠財物等事應
即按律從重治罪該管將備等平日加意教誡臨
時尤當嚴行約束無許違犯

一兵丁奮勇殺賊應予獎賞但恐兵丁等希圖冒
功任意朦混不可不預為防範凡軍法將他人戰
功冒為己功及謊稱實在効力將無作有以輕報
重者斬該管將備等應隨時曉諭親自稽查俾立
功者得賞冒功者治罪以期核實

一行軍馬駝最宜愛惜凡兵丁等收放須揀擇水草吊臚須按照時候遇有疲乏加意調養夜間尤宜小心看守偶有遺失須立時尋獲至所挖井泉不許污穢飲馬各挨次序毋許爭先以致壅塞如有違犯立即重懲不貸

一劉營後巡邏防守毋得疎懈夜間不許無故行走帳房內更要小心火燭遇有警報靜聽將令不得輕舉妄動若奉有密令須各自遵守毋得私相

洩漏該領兵將備等尤宜申明號令隨時曉諭不得踈懈

臣等謹案行師之道首重紀律

本朝武功之盛戰必勝攻必克所向無敵者皆由號令嚴明賞罰必信故也書稱用命賞于祖不用命戮于社是賞之與罰皆為軍令所重茲以軍令各條謹加登載至於計功敘賞亦有一定之典所以鼓勵戎行振興士氣即附編於左

凡議敘軍功行間將帥著有勞績有

特旨優敘者由部覆議奏請隨時酌定其由統兵將帥
列序官兵功績等次造冊送部者部核其實分為
五等八旗官兵給以印軸曰功牌應授世職者移
咨吏部甄別授之自雲騎尉始按功遞加未至授
世職者由部註冊仍令圖功准其積算功牌之式
以紫綾為面潔白厚紙四邊墨印螭文內註明功
次凡填功績及年月處鈐用部印編次號數覈對

給發一等功牌長三尺六寸五分二等功牌長三尺三寸五分三等功牌長三尺五分四等功牌長二尺八寸五分五等功牌長二尺六寸五分均各廣尺有五寸五分從征有功者文職視武職王公所屬護衛親軍視官兵委署官視見任各以所得軍功等第予敘綠旗官兵第功議敘者曰功加立一等功者准功加一等紀錄二次二等加一級紀錄一次三等紀錄三次四等紀錄二次五等紀錄

一次立功多者積算授以世職凡提督有功加十等至于總有功加二十四等皆准給一雲騎尉文職軍功應功加一等者准加一級叙功不實者各論如法

叙八旗官兵軍功之制凡用雲梯攻城視城之大小攻之難易分等次授世職克府城者分五等一等叙六人第一人授一等輕車都尉次授二等輕車都尉次授三等輕車都尉次授騎都尉兼一雲

騎尉次授騎都尉次授雲騎尉領戰官授騎都尉
指路官及射箭官並授雲騎尉二等叙四人授世
職自三等輕車都尉以下以次遞降領戰等官與一
等同三等叙三人授世職自騎都尉兼一雲騎尉
以下四等叙二人授世職自騎都尉以下領戰官
並授雲騎尉指路官克兩城者授雲騎尉五等叙
一人授雲騎尉領戰官克兩城者亦授雲騎尉克
一城者注冊克州城者分四等一等議叙視克府

城二等克縣城者分三等一等議叙視克州城二等其餘均以次遞降克衛城與州城同所城與縣城同如敵兵據寨築堡或師艱苦攻克各視其寨之大小與城之等次相較議叙其賞賚以府州縣衛所為等次克府城者賞五人第一人賞銀五百兩次三百五十兩次二百五十兩次百五十兩次百兩領戰官視第二人指路官視第三人射箭官視第五人昇雲梯人各賞銀三十兩克州城衛城

者減府城一等賞四人第一人賞銀四百兩次二百五十兩次百五十兩次百兩克縣城所城者減州城一等賞三人第一人賞銀三百兩次百五十兩次百兩其領戰官指路官射箭官及昇雲梯人均以次遞降給賞鑿毀城垣者視雲梯攻城例給賞用大礮攻城不論府州縣衛所均賞三人第一人賞銀二百兩次百兩次五十兩領戰官視第二人指路官視第三人射箭官不叙礮手克府城各

賞銀十五兩克州城衛城各十兩克縣城所城各
五兩奪門入城及無雲梯而疾走登城者賞三人
第一人賞銀百五十兩次百兩次五十兩領戰官
視第二人指路官視第三人凡攻戰之時敵人掘
塹排柵堅壁難克我軍正在相持有能越衆前驅
衆軍隨進克敵者叙三人第一人賞銀百兩仍咨
吏部授世職次賞銀八十兩給越衆前驅二等功
牌次賞銀六十兩給三等功牌均注冊積兩次三

等功牌者准作一次二等積至兩次二等者咨吏部授世職凡齊力交鋒之時有於本旗行隊前出衆衝鋒前進本旗大隊隨進克敵者叙三人第一人賞銀五十兩給本旗前進一等功牌次賞銀四十兩給二等功牌次賞銀三十兩給三等功牌均注冊積兩次三等功牌者准作一次二等積兩次二等功牌者准作一次一等積至三次一等者咨吏部授世職如對敵之時官兵力戰不退八旗執

燾人有能鼓勇首進者照越衆前驅例叙三人第一人賞銀百兩仍咨吏部授世職餘以次遞降如官兵前進將及十人執燾人續進者惟叙一人賞銀五十兩對敵時一旗內有叅領下執燾人在衆叅領前首進者照本旗前進例叙三人第一人賞銀五十兩給一等功牌餘以次遞降續進者惟叙一人賞銀二十兩凡遇水戰時能超登敵舟殺賊有獲者視舟之大小分為三等一等舟叙五人第

一人賞銀二百五十兩次二百兩均咨吏部分別授世職次賞銀百五十兩給一等舟之三等功牌次賞銀百兩給一等舟之四等功牌次賞銀五十兩給一等舟之五等功牌均注冊積兩次五等功牌者准作一次四等以次遞加積至兩次三等者咨吏部授世職二等舟叙四人第一人視一等舟之次給賞授世職其餘以次遞降其功牌注明二等舟自二等功牌至四等功牌均注冊積至兩次

二等者咨吏部授世職三等舟叙三人第一人視
二等舟之次給賞其餘以次遞降其功牌注明三
等舟自一等功牌至三等功牌均注冊積至兩次
一等者咨吏部授世職其不列等次之常舟叙三
人第一人賞銀八十兩次六十兩次四十兩其功
牌注明常舟自一等功牌至三等功牌均注冊積
至三次一等者咨吏部授世職凡在舟督戰官視
第二人餘官視第三人在舟前鋒校護軍校驍騎

校等視第四人均按舟論功若追獲空舟小舟及
敗走之舟者不在給賞授世職之內如招撫敵人
千名以上敵舟三十艘以上者為五等軍功招撫
人每增五百名舟每增十艘各加一等人至三千
名舟至七十艘者為一等軍功人自三千五百名
以上舟自八十艘以上臨時酌量從優議敘招撫
城池以府州縣衛所為等次招撫府城為一等軍
功州城為二等軍功縣城為三等軍功衛城所城

為四等軍功有名寨崖為五等軍功其立功官兵
未及議叙病故者均按其立功等次以為敘官得
一等二等軍功者給一子監生食七品官俸三等
四等軍功者給一子監生食八品官俸均令隨旗
効力五等軍功給一子監生准其應試兵丁委署
官員給葬銀二十兩外得一等軍功者給功牌銀
五十兩二等以下每等減銀十兩八旗武職陣亡
者予贈廕給祭葬各視爵秩之大小

順治九年定
凡陣亡人等

之子孫襲次已完者賞給七品官其卹賞銀自一世職乾隆十六年定名為恩騎尉

千一百兩至二百二十兩有差兵丁陣亡給賞八旗領催護軍各二百兩驍騎百五十兩礮手百三十兩棉甲兵百兩從役七十兩臨陣受傷者一等傷給賞五十兩遞降至五等每等減十兩傷至殘廢者視陣亡例減半

敘綠旗官兵軍功之制凡用雲梯攻城分別等次授職克府城者分五等一等叙五人第一人授叅

將次授遊擊次授都司次授守備次授千總二等
叙四人授職自遊擊以下三等叙三人授職自都
司以下四等叙二人授職自守備以下五等叙一
人授千總克州城者分四等一等議叙視克府城
二等以次遞降授職克縣城者分三等克衛城所
城者分二等遞降授職亦如之議叙五人四人者
領戰官功加四等指路官功加二等議叙三人二
人者領戰官功加二等指路官功加一等議叙一

人者領戰官功加一等指路官不叙若城被礮擊及鑿毀兵丁因而乘勢先登者叙一人授千總領戰官功加二等其賞賚以府州縣衛所為等次克府城者賞五人第一人賞銀二百五十兩次二百兩次百五十兩次百兩次五十兩次克州城者減府城一等賞四人克縣城及衛城所城者並減州城一等賞三人凡強敵在前陣堅壘固能倡衆戰勝者叙三人第一人賞銀五十兩授守備次賞銀四

十兩授千總次賞銀三十兩授把總若勢均力敵
有於本營中衝鋒前進者叙二人第一人賞銀三
十兩授千總次賞銀二十兩授把總凡遇水戰時
能超登敵舟殺賊有獲者分為三等一等舟叙四
人第一人賞銀百兩授都司次賞銀八十兩授守
備次賞銀六十兩授千總次賞銀四十兩授把總
在舟督戰官加三級同戰官加二級二等舟叙三
人授職自守備以下賞賚視一等舟之次以次遞

降三等舟叙二人授職自千總以下賞賚視二等
舟之次以次遞降督戰官及同戰官以次分別加
級紀錄礮手奪舟者叙功與兵丁同以礮擊沉舟
者一舟賞銀二十兩二舟賞銀四十兩授把總三
舟賞銀六十兩授千總多者以次遞加如招撫敵
人五百名以上或一等大舟五艘難民五千人以
上計其多寡大小紀錄加級及功加等次各有差
二等中舟十艘三等小舟二十艘以上或難民二

千人以上者紀錄一次招撫人至二千名大舟至
十艘中舟至二十艘小舟至四十艘難民至五千
名者文職加一級武職功加一等數多者以次遞
加其立功官未及議叙病故者一二等軍功給一
子監生以把總用三四等軍功給一子監生以外
委把總用五等軍功給一子監生隨營食糧願應
試者聽兵丁照例給銀直省武職陣亡者按品給
以贈廕祭葬加贈或二級及一級加廕自都司至

把總卹賞銀自八百兩至百兩各有差兵丁陣亡
給賞綠旗馬兵七十兩步兵五十兩土兵助戰者
減步兵之半臨陣受傷者一等傷給賞三十兩遞
減至五等每等減五兩

皇朝文獻通考卷一百七十九

欽定四庫全書

皇朝文獻通考卷一百八十

兵考二

禁衛兵

臣等謹案自古天子端居法宮必有期門羽林之士環衛而擁護是故周廬千列執戟百重入守禁廷出司警蹕職綦重矣周禮太宰所屬宮正掌宮中之官府宮伯掌王公之士庶子各辨其次舍之

職而後世於是乎有郎衛司馬所屬虎賁氏有虎士八百人掌先後王而趨以卒伍視朝則在路門之右而後世於是乎有兵衛漢唐以來名號雖殊規制相仿前考所述具詳我

朝以八旗統兵不襲古制而自與古合侍衛之職選三旗中材武出衆之子弟及各執事効力人等之可任者為之分班入直其優者擢為

御前侍衛

乾清門侍衛而統以三旗領侍衛內大臣即所謂郎
衛也前鋒統領所轄之前鋒護軍統領所轄之護
軍掌宿衛清蹕及宮禁傳籌內禁門啟閉內府三
旗所轄之前鋒護軍驍騎掌守衛隨從八旗都統
所轄之驍騎掌各處直班巡徼步軍統領所轄之
步軍掌禁城汛守外禁門啟閉即所謂兵衛也兵
衛之中專衛禁苑者為

圓明園八旗護軍營及內府三旗護軍營其演習槍

礮者別為火器營演習雲梯者別為健銳營專備
行狩者別為虎槍營而禁衛之兵備矣夫自古禁
旅之虛實尤為戎政所亟明代置侍衛上直軍領
以錦衣及金吾諸衛置京軍三大營及四衛營所
謂郎衛兵衛者其制未嘗不具尋以狃於晏安威
漸不振及其究也軍多隱占尺籍久虛而兵事遂
不可問哉

國家建旗之制包舉無外諸營並列綦布星羅而悉

統之以八旗其稽覈有法其選擢有方其番直有期其訓習有道分職設官練材于素有事則收折衝之效無事則備翊衛之班所以上應勾陳環拱宸極者所由來遠矣

領侍衛府

領侍衛內大臣六人

鑲黃正黃正白三旗每旗各二人

內大臣六

人散秩大臣無定員一等侍衛六十九人二等侍衛一百六十八人三等侍衛三百三十三人

初制設三

旗一等侍衛六十人二等侍衛一百五十人三等侍衛二百七十人康熙三十七年增設宗室侍衛無定員雍正七年定宗室侍衛一等九人二等十八人三等六十三人共設九十八人并入三旗隨班行走

四等侍衛無定員

四等侍衛雍正三年增設

藍翎侍衛九十

人

三旗侍衛每十人設什長一人即於什長及兩翼班領署班領內定以十二人隨印協理事務

御前侍衛

乾清門侍衛

皆於三旗侍衛內簡用

及漢侍衛

漢侍衛康熙三十七年增設亦

有一二三等及藍翎之分於武進士內簡用

皆無定員主事一人筆帖

式十二人貼寫筆帖式十五人親軍校七十五人

鑲黃旗十五人又下五旗移八十八人正黃旗十五人又下五旗移八十一人正白旗十五人又下五旗移八十九人親軍九百九十五名

三旗滿洲蒙古每佐領下親軍二名鑲黃

旗二百二十四名又下五旗移八十一百三十名正黃旗二百三十四名又下五旗移八十一百三十五名正白旗二百三十名又下五旗移八十一百三十七名內以七十五人為親軍校此三旗親軍每旗選六十名隨侍衛班入直餘皆隨三旗護軍營護軍校護軍一體直宿差遣

凡宿衛之制更番輪直三旗侍衛分六班班分兩

翼

鑲黃旗為左翼正黃旗為右翼正白旗半為左翼半為右翼

各設侍衛班領

二人署班領二人侍衛三十人宿衛

乾清門為內班晝坐門禁夜守局鑰散秩大臣一人
侍衛親軍十人宿衛

中和殿侍衛什長三人侍衛親軍三十人宿衛

太和殿為外班以領侍衛內大臣一人總統之內大
臣散秩大臣二人隨班入直

凡扈從之制後扈二人於領侍衛內大臣內

簡用前引十人於內大臣散秩大臣暨統領副都統內
簡用豹尾班侍衛於三旗侍衛內選功臣後裔六十人

日以二十人直

後左門每

乘輿出入以十人執豹尾槍十人佩儀刀侍於

乾清門階下左右

駕出豹尾班侍衛殿於後以領侍衛內大臣一人侍衛

班領二人統之

駕還宮隨至

乾清門退歸直

皇帝御太和殿受朝前引侍衛二人自

乾清門

後左門導至

殿後止後扈大臣二人自

乾清門扈從

如像自

御前大臣則
宮內隨出後並同

前引大臣十人

候於

殿北階下

駕至按翼前導進

殿由兩旁趨至

寶座前北上東西面立後扈大臣於

寶座左右僉立豹尾班侍衛於

寶座後左右南嚮序立

皇帝詣

皇太后宮行禮前引侍衛二人自

乾清門導至

永康左門止前引大臣候於

隆宗門內

駕至按翼前導至

慈寧門階止豹尾班侍衛至門階下左右牆角止立後扈

大臣隨升階稍後僉立

駕還宮引扈如前遇

御門聽政屆時直班侍衛引有事各官由

後左門入

日常入奏官亦均由侍衛引進

豹尾班侍衛於

乾清門階下左右牆角立領侍衛內大臣直班內大

臣侍衛於階下立侍衛班領每翼一人於階上左

右楹前立

御前侍衛隨

駕出暨

乾清門侍衛於

御座兩旁立

駕還宮

御前侍衛隨入餘各退歸直

御經筵日侍衛二人前導至

文華門止後扈大臣隨至

寶座左右立

御前侍衛

乾清門侍衛於

寶座後兩旁豹尾班侍衛於

殿外階下均左右立如

御箭亭侍衛二人前導至降輿處止豹尾班隨行遇外

藩來朝及

召見外藩使臣或於便殿或於

駐蹕行宮前引後扈大臣皆侍班

御前侍衛

乾清門侍衛直日侍衛班領豹尾班侍衛均於

殿內按翼序立

皇帝躬祀

郊壇前引侍衛二人自

乾清門前導至

午門外止前引大臣候於

太和門北階下

駕至按翼前導後扈大臣隨行各自

午門外乘馬至

壇門外下馬均佩刀引扈

御輦前後執燈侍衛四人輦前執提爐侍衛二人皆步

從輦後豹尾班執槍侍衛十人佩儀刀侍衛十人

佩弓矢侍衛二十人以領侍衛內大臣一人侍衛
班領二人統之次後散秩大臣一人侍衛班領一
人署班領一人侍衛什長二人次建黃龍大纛二
率以領侍衛內大臣或內大臣散秩大臣一人司
纛侍衛什長二人及

壇前引大臣在

圓丘壇於三成階上立

方澤壇及

日壇

月壇於二成階下立後扈大臣隨升

壇於

駕後立豹尾班侍衛於

壇內壝門外立祀

祈年殿饗

太廟前引大臣由左階升

駕入殿門於中門外一成階上立後扈大臣隨入於

駕後立豹尾班侍衛於三成階下立祀

社稷壇前引大臣立於內壝門外豹尾班侍衛立於拜

殿南門外展拜

堂子前引大臣立於甬道北豹尾班侍衛立於祭

神殿兩旁祀

先農壇前引大臣立於階下豹尾班侍衛立於樂懸南

遇

駕耕藉

御具服殿前引大臣立於殿前階上

駕御耜田引至耕所三推禮成引由觀耕臺午階升立

於

御座前凡序立均按翼分左右後扈大臣均隨升降於

駕後左右僉立遇

大閱日前引後扈大臣均甲冑引扈豹尾班侍衛甲冑

殿後

御前大臣侍衛等均甲冑隨行其次黃龍大纛行三旗

親軍甲冑按次行

駕御帳殿豹尾班侍衛按翼排列左右建黃龍大纛三旗侍衛親軍按翼環衛遇

皇太后

皇后

妃嬪出入以

乾清門侍衛四人暨侍衛十人前導如出郊外前引侍衛二十人其餘侍衛在豹尾班後扈從

凡

行在宿衛扈從遇

車駕巡幸

御前大臣侍衛暨

乾清門侍衛皆從其六班輪直之侍衛以一班或二

班隨往遇恭奉

皇太后巡幸則三班隨往日行以侍衛二十人前導二十

人左右翊衛均屬橐鞬豹尾班侍衛二十人後從

以領侍衛內大臣一人侍衛班領二人統之以領侍衛內大臣或內大臣散秩大臣一人侍衛什長二人率黃龍大纛行餘侍衛暨扈從各官均列隊按次行仍分令侍衛稽察踰越喧嘩者

御前擎蓋以

乾清門侍衛更番執事

駐蹕行營以內大臣一人散秩大臣二人入直

御前大臣侍衛暨

乾清門侍衛於

御營兩廂分宿

御營黃慢城旌門以侍衛班領一人署班領一人內班
侍衛二十人前東西隅以侍衛班領各一人內班
侍衛各十人後東西隅以署班領各一人內班侍
衛各十人網城門內以侍衛什長三人外班侍衛
親軍三十人環拱宿衛遇恭奉

慈輿行幸

皇太后與前均以侍衛前導翊衛後從如儀

皇太后行營正門以侍衛班領一人侍衛十人後隅以署班領一人侍衛十人宿衛

臣等謹案侍衛班內有上駟院侍衛每旗七人司轡司鞍侍衛無定員隸上駟院其兼尚虞鷹鷄房鵲房狗房十五善射善騎射善射鵲善強弓善撲等侍衛各有專管統在三旗額內均無定員又案鑾儀衛亦係侍從武職設有掌衛事內大臣一人

鑾儀使三人

滿洲二人
漢軍一人

冠軍使十人

滿洲七人
漢軍三人

雲

麾使二十八人

滿洲二十人
漢軍八人

治儀正四十二人

滿洲

二十人
漢軍二十二人

整儀衛二十九人

滿洲十三人
漢軍十六人

專司

乘輿鹵簿凡分掌各儀制具詳王禮考茲不復列其所

屬軍尉儀刀弓矢戈戟用親軍豹尾槍仗馬用護

軍蒙古畫角用蒙古鳴角軍其奉輦擎執儀仗各

校尉由內府選充者為旗尉由五城選充者為民

尉奉輦旗尉一百六十八人民尉六十人各執事

旗尉二百四十六人民尉三百二十二人左右中

前後五所民尉計一千三百二十八人馴象所民

尉二百六人八旗漢軍司更兵四十人

凡門鐘鼓樓

煎漏每夕委官半校尉直更凡更亦如之遇

巡幸駐蹕直行宮前鳴角鼓

蔡均隸在軍數謹附載於此

八旗驍騎營

滿洲八旗都統每旗各一人副都統各二人驍騎

叅領各五人副驍騎叅領各五人

康熙三十四年於每旗叅領下

增設委署叅領雍正元年改名佐領無定員隨人編

副叅領蒙古漢軍八旗並同

設每佐領下驍騎枝一人領催五名初制滿洲及蒙古每佐領

下設領催六名康熙四十年酌裁一名驍騎二十名弓匠一名鞍匠

或鐵匠一名

蒙古八旗都統每旗各一人副都統各二人驍騎

叅領各二人副驍騎叅領各二人佐領無定員每

佐領下驍騎枝一人領催五名驍騎二十名弓匠

一名鞍匠或鐵匠一名

漢軍八旗都統每旗各一人副都統各二人驍騎

叅領各五人副驍騎叅領各五人佐領無定員每

佐領下驍騎校一人領催五名烏槍驍騎四十一

名每旗藤牌兵一百名

雍正二年設漢軍每佐領下藤牌兵四名乾隆元年

定漢軍每旗設藤牌兵一百名六年定藤牌兵歸并大營每旗百名於烏槍子額內選取並簡選叅

領一人散秩官驍騎校各二人領催五人令其管轄

天聰年間設阿禮哈超哈

即驍騎

營為驍騎營之始

順治初詳定營制凡八旗序次鑲黃正黃正白為

上三旗鑲白正紅鑲紅正藍鑲藍為下五旗行軍
蒐狩以鑲黃正白鑲白正藍四旗居左為左翼正
黃正紅鑲紅鑲藍四旗居右為右翼

凡八旗方位雍正六年奏定鑲黃滿洲蒙古漢軍
三旗自鼓樓嚮東至新橋自新橋大街北口城根
嚮南至府學衙東口與正白旗接界正黃滿洲
蒙古漢軍三旗自鼓樓嚮西至新街口自大街北
口城根嚮南至馬狀元衙衙西口與正紅旗接界

正白滿洲蒙古漢軍三旗自府學衙東口嚮南至大市街豹房衙衙東口與鑲黃旗接界自

皇城根嚮東至大城根與鑲白旗接界鑲白滿洲蒙古漢軍三旗自豹房衙衙嚮南至就日坊與正白旗接界自

皇城根嚮東至大城根與正藍旗接界正紅滿洲蒙古漢軍三旗自馬狀元衙衙東口與正黃旗接界自

皇城根嚮西至大城根與鑲紅旗接界鑲紅滿洲蒙古漢軍三旗自羊肉衙嚮南至瞻雲坊與正紅旗接界自

皇城根嚮西至大城根與鑲藍旗接界正藍滿洲蒙古漢軍三旗自就日坊至崇文門由金水橋嚮東至大城根與鑲白旗接界鑲藍滿洲蒙古漢軍三旗自瞻雲坊至宣武門由金水橋嚮西至大城根與鑲紅旗接界

凡城門直班之制內城九門安定德勝東直西直
朝陽阜成崇文宣武八門各按官兵居住方位以
八旗滿洲蒙古漢軍分直正陽門以八旗滿洲蒙
古輪直外城七門以鑲黃旗正白旗直東便門廣
渠門以正黃旗正紅旗直西便門廣寧門以正藍
旗鑲藍旗鑲白旗鑲紅旗直永定門左安門右安
門均以漢軍雍正六年於八門城外增建營房仍
按八旗方位每旗委滿洲蒙古漢軍官四人驍騎

欽定四庫全書

皇朝文獻通考
卷一百八十

校四人驍騎滿洲一百二十名蒙古四十名漢軍四十名各旗均分為四班每班以委官一人驍騎校一人驍騎五十名令其更番居住看守十二年又定正陽門兩旁城門即於看守八門官兵內八旗共委官四人驍騎校四人每旗各委驍騎十人按翼看守十日一次更代每日按翼各委兵十名晝夜巡宿以為常

凡汛守之制康熙二十二年定遇

陵寢及

車駕巡幸八旗驍騎營於內九門城上每旗增設汛六所於街道每旗增設汛十所內城各門於門內各增設汛一所正陽門八旗輪直其餘八門八旗分設汛各一均委官兵看守乾隆五年復定凡恭謁駐蹕圓明園南苑等處並逢年節封印後照例於城上每旗設汛六所共四十八所委驍騎營官兵與城上步軍營分汛相間看守每旗於滿洲蒙古漢軍

內會委叅領一人約束如遇

巡幸口外及遠省則每旗增設汛十五所將步軍撤下
分防大街巷口城上汛守悉易以驍騎營分委驍
騎校領催驍騎晝夜巡宿以叅領二人往來稽察
凡各處守衛之制雍正八年定戶部銀庫以鑲黃
旗委官二人領催二人兵十八人顏料庫以正黃
旗委官四人驍騎校四人領催四人兵三十八人
緞疋庫以正白旗委官二人驍騎校二人兵五十

人工部製造庫以正紅旗兵五人刑部贓罰庫以
鑲藍旗委官一人領催一人兵九人宗人府庫理
藩院庫左翼四旗每庫輪委官一人領催一人兵
九人禮部庫西什庫宗人府閑空室八旗輪番每
處各委官一人領催一人兵九人鴻臚寺龍亭以
正紅旗兵八人

圓明園直月

今為
直年

衙門左右翼各輪委領催一人兵

二人海運倉以鑲黃旗北新倉以正黃旗儲濟倉

以鑲白旗裕豐倉以鑲紅旗各委官二人領催二
人兵三十八人舊太倉以正白旗南新倉以鑲白
旗興平倉以正紅旗富新倉以鑲紅旗各委官二
人領催二人兵十八人萬安倉以正紅旗委官四
人領催四人兵三十一人祿米倉以正藍旗委官
二人領催二人兵三十三人太平倉以鑲藍旗委
官四人領催四人兵四十一人皆兼用滿洲蒙古
漢軍工部節慎庫以鑲紅旗滿洲光祿寺銀庫以

正藍旗漢軍各委官一人領催一人兵九人工部
濯靈廠八旗漢軍輪委官四人兵二十人戶部內
倉以正白旗滿洲領催二人兵六人以上各晝夜
守衛喀爾喀館圍牆於喀爾喀到日委正藍旗滿洲
蒙古漢軍官二人兵十人館門委官一人領催一
人兵九人俄羅斯館於俄羅斯到日八旗滿洲蒙
古漢軍共設班房十六處每四處委叅領一人每
處委官一人兵十五人館門輪委叅領一人兵二

十人外館於馬匹到日八旗滿洲蒙古輪委官二
人驍騎校二人兵二十人後黃寺於蒙古使臣及
喇嘛來使到日八旗滿洲蒙古輪委官一人兵十
人晝夜守衛均於回日徹退

凡防火之制順治初年設八旗火班雍正八年定
凡遇失火在東南城令正藍鑲白二旗在西南城
令鑲藍鑲紅二旗在東北城令鑲黃正白二旗在
西北城令正黃正紅二旗各率官兵往救若

皇城之內每翼令二旗救護凡步軍等見某處失火即報知相近旗分乾隆六年復定八旗火班八處每處滿洲蒙古漢軍旗更番輪直以都統或副都統一人叅領二人叅領以下官八人領催八人驍騎七十二人如遇旗界及接壤之地有不戒於火者都統等即領直班官兵之半往救其餘官兵仍留該班處備用

八旗前鋒營

前鋒統領左右翼

鑲黃正白鑲白正藍四旗為左翼正黃正紅鑲紅鑲藍四旗為

右翼各一人或以王公大臣兼任

前鋒叅領每翼各八人每旗俱滿

洲蒙古兼用餘倣此

前鋒侍衛各八人

雍正三年定以左右翼前鋒叅領各一人

前鋒侍衛各一人隨印協理事務

委署前鋒叅領各四人

乾隆七年增

設即於前鋒校或親軍校內選委給五品虛銜仍食原餉

前鋒校各四十八人

雍正三年定以左右翼前鋒校各二人隨印

隨印筆帖式各二人初制每翼

各一人康熙四十六年酌裁雍正三年復增設

藍翎前鋒長委署前鋒校

各四人

即於藍翎前鋒長內選委

藍翎前鋒長

每十人設長

各二十

人鳥鎗隊長委署藍翎前鋒長各四人

即於鳥鎗隊長內選

委鳥鎗隊長

每十二人為一隊

各二十人前鋒委署鳥鎗

隊長各四人

即於前鋒內選委

前鋒八旗滿洲蒙古每佐

領下各二名

自委署前鋒校以下皆在兵數內

天聰年間設噶布什賢超哈

即前鋒

營為前鋒營之

始順治初詳定營制凡宿衛扈從之制與八旗護

軍營一體派委

制詳後護軍營

其

行在宿衛扈從前鋒叅領前鋒侍衛共八人率前鋒校

前鋒共百二十人於

御營前一二里外相度形勢安設卡倫立前鋒旗二以
為門戶兩旁以次列帳各於帳內巡警宿衛有於
卡倫內行走者坐以軍法次日各屬橐鞬控馬於
道旁排立候黃龍大纛過各乘馬整隊扈從

八旗護軍營

護軍統領八旗各一人護軍叅領每旗滿洲十人

蒙古四人

每旗設內司鑰長一人署司鑰長一人

副護軍叅領如叅

領之數

初設委署參領雍正元年改名副參領三年定以每旗護軍參領各一人副護軍參

領各一人隨印協理事務

委署護軍參領每旗各七人

乾隆十七年增

設即於護軍校或親軍校內選委給五品虛銜仍食原餉

護軍校八旗滿洲蒙

古每佐領下各一人

雍正三年定以每旗護軍校各二人隨印

隨印筆

帖式每旗各二人

初制每旗各一人康熙四十六年酌裁雍正三年復增設

門

筆帖式鑲黃正黃正白三旗各十人護軍滿洲蒙

古每佐領下各十七名

天聰年間設巴牙喇

即護軍

營為護軍營之始順治

初詳定營制初以上三旗護軍叅領護軍校護軍等守衛

禁門下五旗各守王公府門遇行圍出征則八旗一律分撥雍正七年始定八旗護軍均司禁衛

凡宿衛之制

景運門統領一人以前鋒統領或司鑰長一人護軍

校三人門筆帖式二人閱門籍護軍一人護軍十七人

隆宗門協理統領事務叅領一人

康熙六十一年增設統領一人雍正

四年定以協理事務護軍叅領或前鋒叅領入直

護軍叅領二人

初制設叅領一

人康熙六十一年增定

護軍校三人門筆帖式一人閱門籍

護軍一人護軍十七人

後左門

後右門護軍叅領各一人護軍校各三人門筆帖式

各一人

門筆帖式初制未設後增定

閱門籍護軍各一人護軍

各十二人

中左門

中右門護軍校各二人閱門籍護軍各一人

閱門籍護軍初

制未設後增定

護軍各八人

左翼門

右翼門護軍校各二人閱門籍護軍各一人

閱門籍護軍初

制未設後增定

護軍各八人

保和殿及東西廊內庫護軍校各一人護軍各四人

皆乾隆十五年增設

中和殿護軍校二人護軍三人東西廊護軍校各一

人護軍各四人

康熙十八年於中和殿設護軍校護軍後增定

太和殿

體仁閣

弘義閣護軍校各二人護軍各八人

皆康熙十八年增設

太和門左右門親軍校各二人親軍各八人

初制設護軍校

護軍後改用領侍衛府所屬之親軍校親軍

昭德門

貞度門護軍校各二人護軍各八人

協和門

熙和門護軍校各二人護軍各八人

蒼震門

啟祥門護軍叅領各一人護軍校各三人閱門籍護
軍各一人護軍各十二人

吉祥門及西北隅護軍叅領各一人

護軍叅領初制
未設後增定

護軍校各二人護軍各八人

凝華門

中正殿後門及東北隅東南隅護軍校各二人護軍

各八人

初制惟吉祥門及西北隅東北隅東南隅等處設護軍校護軍後增定

箭亭

及北上門護軍校各二人護軍各八人

皆康熙六十年增

設

文華殿門護軍校二人護軍八人銀庫護軍叅領一

人護軍校二人護軍八人

初制各用八

文華殿及銀庫旗驍騎營官一

人領催一人驍騎九人乾隆二十二年改用護軍

紫禁城四門內磴道柵欄護軍校各二人護軍各八

人

午門護軍叅領一人左右門護軍校各三人護軍各
十二人又左門閱門籍護軍二人

東華門

西華門

神武門護軍叅領各一人護軍校各四人閱門籍護
軍各二人護軍各十六人恭遇

車駕行幸則於三門各增設統領或協理統領事務之

護軍叅領及前鋒叅領一人

雍正元年定每遇行幸則

紫禁城

四門各增統領一人四年又改定今制

以上各委鑲黃正黃正白三

旗官軍按日分班凡丑未日為鑲黃旗首班寅申

日為鑲黃旗二班巳亥日為正黃旗首班子午日

為正黃旗二班卯酉日為正白旗首班辰戌日為

正白旗二班各輪番直宿又有防範火班於雍正

五年定遇有應用齊集之處令直班之護軍統領

內司鑰長等於

左翼門等處護軍每處調二人共四十六名協同內

府直班官兵前往

闕左門司鑰長一人護軍校一人護軍九人

闕右門護軍叅領一人護軍校一人護軍九人

初制
二門

皆以步軍守衛乾隆十
五年改用下五旗護軍

端門

天安門

大清門護軍叅領各一人護軍校各二人護軍各十

八人

初制三門皆以步軍守衛雍正七年改用下五旗護軍

紫禁城外周圍初制以驍騎營官兵守衛雍正元年改用下五旗護軍分定界址

東華門

西華門外以南令正藍鑲藍二旗守衛

東華門

西華門外以北至城角令鑲白鑲紅二旗守衛北面

一帶令正紅旗官軍守衛周環設十六堆汛各叅
領一人護軍校一人護軍九人乾隆十五年增設
柵欄八座各護軍校一人護軍九人以上各委鑲
白正紅鑲紅正藍鑲藍五旗官軍按日分班凡甲
乙日為正紅旗班丙丁日為鑲白旗班戊己日為
鑲紅旗班庚辛日為正藍旗班壬癸日為鑲藍旗
班每旗各二日輪番直宿總隸於

景運門直班統領稽察

凡傳籌之制

紫禁城內五籌遞傳每夕自

景運門發籌西行過

乾清門出

隆宗門循而北過

啟祥門迤而西過

凝華門迤而北過

中正殿後門迤北至西北隅迤而東過西北門

順貞門

吉祥門至東北隅迤而南過

蒼震門至東南隅迤而西仍至

景運門凡十二汎為一週

紫禁城外八籌遞傳每夕自

闕左門發籌西行過

午門出

闕右門循而西經西一汎至南柵欄二汎迤而北經

三汎一柵欄過

西華門經一柵欄四汎五汎六汎至西北隅七汎迤而東經八汎一柵欄過

神武門經一柵欄九汎至東北隅十汎迤而南經十一汎十二汎十三汎一柵欄過

東華門經一柵欄十四汎十五汎至南柵欄循而西經十六汎仍至

闕左門凡二十二汎為一週遇

駐蹕行營內外汎傳籌亦如之

凡禁門啟閉順治初年定每

乘輿出入各門均啟中門

景運門直班統領率

隆宗門叅領司其事並令護軍清蹕每夕

景運門直宿司鑰長率官軍自

後左門

後右門

中左門

中右門

左翼門

右翼門

太和門

昭德門

貞度門以次驗視局鐫

午門以

隆宗門護軍叅領

東華門以

蒼震門護軍叅領

西華門以

啟祥門護軍叅領

神武門以

吉祥門護軍叅領分視局鑄畢各遣護軍校納鑰於
司鑰長司鑰長受驗諸門鑰彙貯於篋復加局鑄

詰朝各門校以次領鑰啟門日以為常雍正四年
於

景運門

隆宗門

東華門

西華門

神武門各頒陰文合符一扇傳諭護軍統領如遇夜
有奉

旨差遣及緊急軍務應即時啟門者俟

大內持出陽文合符該護軍叅領即取陰文合符驗
明啟鑰仍報知統領其

蒼震門

啟祥門等處遇陽文合符至門該叅領即報統領親
齋陰文合符至門與陽文合符比驗乃啟均於次
日具奏乾隆十五年復定

端門

天安門

大清門如

紫禁城門之例每夕由

闕左門直宿司鑰長委護軍叅領一人驗視扁鐃畢
各門護軍叅領收鑰遣護軍校報於司鑰長次日
啟門亦如之

凡門禁王公官員執事人等於

紫禁城門不得擅行出入其准於應行之門出入者

由直班官軍詢明放進如有無故溷入及濫攜入
濫縱入者分別議處凡各衙門官吏均於

午門左門出入其右門自王公以外不得擅行其內
大臣侍衛內務府等官及內廷有執事官與內府
各執事工役等准於禁門行走者均將姓名及所
隸旗分佐領內管領造冊咨送登籍於經由之門
各置一通工匠服役人等則由本管衙門各給火
烙印腰牌書姓名差役持為出入符驗以護軍之

識字者專檢門籍稽其出入籍內無名及不帶腰牌者不准放入又每門設紅杖二以護軍二人更番輪執坐於門下親王以下經行皆不起立有不報名擅入者撻之

凡扈從之制遇

躬祀

壇

廟統領一人同內大臣散秩大臣侍衛等於豹尾班後約

束

駕詣

南郊以八旗護軍叅領三十二人護軍校護軍八百人自
午門起至

齋宮分翼於

輦路兩旁清蹕又以護軍叅領八人護軍校護軍八十
人於神樂署周圍清蹕又以護軍叅領二人護軍
校護軍二十人於

園丘外周圍清蹕

齋宮左門以護軍統領一人上三旗司鑰長一人護
軍叅領一人護軍校護軍二十人宿衛右門以上
三旗協理事務叅領一人護軍校護軍二十人宿
衛

成貞門西大門以上三旗司鑰長一人護軍叅領一
人護軍校護軍二十人宿衛

齋宮外設十四汛以八旗護軍叅領六人每汛各護

軍校護軍十一人巡守

壇外西門外以下五旗護軍叅領二人護軍校護軍二十

人宿衛內

壇西門以下五旗協理事務叅領一人護軍叅領一人護

軍校護軍二十人宿衛如

駕詣

北郊

輦路清蹕之制同又以上三旗護軍叅領三人護軍校

護軍六十人於

壇外西門至內

壇北門清蹕

駕御齋宮後於闕廟清蹕又以下五旗護軍叅領五人
護軍校護軍五十人分令兩旗於樂部宿處三旗
於

壇外西門外各清蹕

齋宮正門以護軍統領一人上三旗司鑰長一人護

軍叅領一人護軍校護軍二十人宿衛內北門內
西門各以下五旗協理事務叅領一人護軍叅領
一人護軍校護軍二十人宿衛

齋宮外設十一汛以八旗護軍叅領八人每汛各護
軍校護軍十一人巡守凡

駕幸瀛臺

承光殿等處以上三旗護軍叅領十二人護軍校護
軍三百人於兩旁排立清蹕

駕幸圓明園南苑等處以八旗護軍叅領三十二人護
軍校護軍八百人於經由之路按旗分翼排立清
蹕凡遇

車駕經行城內以上三旗官軍城外以八旗官軍衛道
清蹕均由

景運門直班統領計程遠近隨時酌委以統領一人
率護軍叅領一人稽察

回鑾亦如之

凡

行在宿衛扈從遇

車駕巡幸視道里之遠近日期之多寡每次合前鋒營計之酌量分派以統領三人營總三人司其事康熙初年定每

駐蹕之地由嚮道總統等先期指示地盤護軍統領營總各一人率護軍叅領護軍校護軍豫往同武備院卿司幄及工部官設

帳殿

御帳繚以黃髹木城

康熙十年改用黃慢城

外為網城設南東西

三旌門門建旗各二南正白東鑲黃西正黃自東
西門以後三面各設連帳護軍統領率八旗官兵
於網城門守衛去網城百步外八旗各設帳房東
四旗左翼西四旗右翼各按翼巡宿建鑲黃護軍
纛於後正黃護軍纛於右正白護軍纛於左路中
設預營或一或二亦由嚮導指定護軍叅領等豫

行張具每日

御營輜重前行三旗營總護軍叅領三人率三旗護軍
纛并行雍正元年定網城改用圓形周設連帳仍
設三門各建上三旗之護軍旗二設宿衛帳房九
守以上三旗護軍於網城外又設連帳一重形亦
圓設四門亦各建護軍旗二南建正藍鑲藍旗各
一東建鑲白西建鑲紅北建正紅旗各二設宿衛
帳房四守以下五旗護軍均統以營總去營六十

丈八旗各設帳房五座由帳房十二丈以外一應
扈從官兵聽其住宿乾隆二年增定黃慢城縱廣
均十有五丈大營之制外方內圓度地縱二十丈
六尺橫十七丈四尺建黃慢城外加網城結繩為
之黃色貫之以網高六尺濶八尺距慢城南東西
各十八丈北十五丈設連帳百七十五座為內城
建旌門三南門建正白金雲龍纛二東門建鑲黃
金雲龍纛二西門建正黃金雲龍纛二周圍建鑲

明黃金雲龍三角旗共四十有一司內旌門以上
三旗護軍叅領六人護軍校護軍六十人設宿衛
帳房九座以上三旗護軍叅領九人護軍校護軍
九十人司之距網城十二丈為外城設連帳二百
五十四座建旌門四南門輪日建正藍金飛虎纛
二次日建鑲藍金飛虎纛二東門建鑲白金飛虎
纛二西門建鑲紅金飛虎纛二北門建正紅金飛
虎纛二周圍外城東南面建正白金飛虎方旗西

南面建正紅金飛虎方旗東北面建鑲黃金飛虎
方旗西北面建正黃金飛虎方旗共六十司外旗
門以下五旗護軍叅領八人護軍校護軍八十人
設宿衛帳房四座以下五旗護軍叅領四人護軍
校護軍四十人司之外城東西為各部院官帳房
距外城六十丈周圍設八旗警蹕帳房四十座每
旗各五每帳房建護軍旗各一東南正藍旗西南
鑲藍旗東北鑲白旗西北鑲紅旗共四十以護軍

叅領四十人護軍校護軍六百人分司警蹕其中
路頓營縱廣各二丈設黃慢城外加網城如大營
之制凡建設大營慢城以護軍叅領三人護軍校
護軍八十人其中路頓營守衛以護軍叅領二人
護軍校護軍四十人建設頓營慢城以護軍叅領
一人護軍校護軍二十人管輜重以護軍叅領二
人護軍四十人如

駕幸口外行圍以護軍叅領八人護軍校護軍一百二

十人建設慢城於額派叅領外增用蒙古護軍叅
領一人護軍校護軍二十人禁踐踏田禾以護軍
叅領八人護軍校護軍一百二十人司指立隨營
市集以護軍叅領二人護軍校護軍二十四人司
督率刈草以護軍叅領一人護軍校護軍二十四
人護輜重領三旗纛護軍叅領三人持纛隨纛護
軍校護軍一百二十一人隨護

御用輜重護軍叅領一人護軍校護軍十人其每日扈

從官軍並於八旗內隨時委用

御營嚮導

附載

總統無定員

以前鋒統領護軍統領八旗副都統兼任

於八旗前鋒營

護軍營內每旗選叅領侍衛四人前鋒校護軍校
前鋒護軍六人佐之

凡遇

時巡省方以嚮導總統一人先期率官校詣

車駕經行之地周覽山川通橋梁夷險隘計程入告

駕行佩橐鞬前導每日

駐蹕後以次日程途及

駐蹕之所奏

聞交

行在兵部曉諭闔營

回鑾亦如之凡

御營及頓營看城均由嚮道總統先期指示飭所在有


司修治營盤

臣等謹案

御營嚮導雖無專設之員而於翊衛之中責任綦重其

隨時

簡任者皆前鋒營護軍營官謹附載於兩營之後



皇朝文獻通考卷一百八十